



明詩正聲卷之二

五言古詩二

廣陵

盧純學

選

江一夔

校閱

李夢陽

發京師

蔦蘿附松栢枝葉固相因
 行子念儔匹况遇同鄉親
 北風起河梁日暮多飛塵
 携手同車歸駕言西適秦
 道遠長渴飢客子懷苦辛
 仰瞻天漢流永夜不得晨
 驂馬媚其曹鳴鴈各求羣
 明星



出東方照見車下人夙興即枉道登彼高路津
還顧望京邑愴焉何所陳

與客問答

長跪牽客裾故鄉今何如客起長跪言故鄉不
可居墳壠既蕪沒寧復識田廬隣巷鮮故人族
屬半丘墟巖巖高山谷今為官路衢主人聆客
言涕泗交漣如離鄉三十載小女為人姑邇者
日以親遠者日以踈狐狸知故穴牛馬知故陸
願為連理樹托根北山隅

申州贈何子

翩翩雙黃鵠凌風各將去哀鳴岐路側一步一
回顧何異同心子失散在中路別君倏五載我
髮忽已素今逢不須更趨駕一何遽臨分但踟
躕道語不及故山川何悠悠白日奄欲暮努力
愛玉體慰我長思慕

述憤時坐劾壽寧侯逮詔獄

帝居杳何許蒼蒼隰九閼白玉為阿閣黃金為
重門可望不可扣仰見飛雲奔何當發炎旭下

照孤葵根

離憤時闈瑾知劾章出予手矯旨收詣詔
獄

結髮事君子締結固不解青蠅玷白璧馨香逐
時改恩阻愛不周棄擲非所悔紅塵何冥冥白
日淪西海對面有訣絕何況萬餘里得寵各自
媚誰為展情理訛言方蝟興君子慎其始

雜詩

灼灼綴枝華榮艷一何好朝陽溢其葩餘光照
寒槁冠蓋沓衢路致身競先早磬折多譽場銷
鑠成醜老一夕不復晨隕落隨秋草逍遙可竟
世繁華詎可保

其二

毀譽不可校校之心煩悲榮名蓋一世千載誰
見之塞翁失其馬馬歸駒來隨生死尚無常萬
事誠塵灰舒嘯飲醇酒聊與玄化嬉

轅駒嘆

世徑互險夷富貴安所需昔為櫪中駿今為轅

下駒白日仰悲鳴青雲立踟躕未蒙主人顧何
由効馳驅朝思碣石津夕睇流沙隅常恐侶凡
蹇棄捐中路衢

自太過渡河趨陂沙岡

凌春遠行邁游目恣泐越漸辨林中曙遽失霞
上月觸物誰為情悲嘆曷可歇載登隋疆場况
眺宋城闕陽坡散初柳陰曲峙寒雪只此判氣
候豈必殊燕粵潛潛濁河駛叟叟晨風發揚帆
截驚瀨倚棹望窮髮鳧雁眇難即汀蘭翠堪結
美人既莫期天路復幽絕陂岡鬱參錯岫沙皓
明滅日暮孤雲興何以慰忡悒

遊北門山水示同好數子

山客戒明發朋故來攀留巖潭窈巨測險徑增
離憂曰余負幽僻誦古歌遠遊陟懷康樂屐浮
羨鷗夷舟探討傾子長浪迹多阮侯若人不可
作瑤草竟何酬事往悲易深情存道難侔以此
激孤詠喟焉睇滄洲安波有覆艦坦路無全輜
危虞豈在嶽薄劣終見尤顛附綠蘿緣永與棲

者儔

塞上雜詩

邊烽日夜至飛符來會兵牛羊入高砦鷄犬皆
震驚壯士按劍起鞍馬若流星鎗急萬人靡笑
上受降城生繫五單于歸來獻天庭

酬伊陽殷明府追憶見寄十四韻

弱齡負竒節志欲凌海岳白馬金陵來遊戲宛
與洛出從七貴飲醉調五侯譔妍華不見售讒
巧息愛奪涼風卷團扇世路隨飛藿謫居宰山

邑頗喜占名郭川嶺鬱森秀烟雲日噴薄况當
素秋霽清霜掃天末龍峰既竦峻伊水復澄豁
啓牖眺飛泉據案望岑岬獨撫岩中琴遙枉汴
上作懷賢諒在茲感舊但如昨徒然佇王鳧未
果偕緱鶴終期謝紛袂携手向嵩岳

出塞曲

單于寇邊城漢將列長營旌旗蔽山谷鉦鼓晝
夜鳴乘我浮雲騎發我明月弓竒兵左右出長
驅向營中彭彭陣結虎颯颯劍浮虹一戰臯蘭

滅再戰沙漠空歸來獻天子長揖不言功

贈青石子

高鳥有違群離獸多悲音懿彼婉孌子悵焉分
此襟朝發南河隅夕暮乃北岑玄雲既無極黃
波浩且深君其四海翔無言還舊林

赴懷玉山

始臨清溪寺不謂茲路艱崎嶇踰南嶺轉見山
鬱盤重陰起北谷凍雨響前巒志定邁孰禦勇
往竟孤攀挽葛接懸狖架木凌飛湍律律巖壑
變颯颯嵐風寒隔港望絕岫亭亭已雲端

三忠祠

憶昔漢孔明龍起荅三顧志決竟星隕嘔血為
軍務鄂國與信國屹屹兩砥柱殺身不救國冤
憤水東注往事勒鍾鼎新廟傍官路慘慘冠劍
並凜凜生魂聚翠旗晚明滅往往鬼神駐懷歎
各不申翻然向煙霧我征久奔迫過此感傷屢
時來肅展謁繫馬門前樹香臺野蕨上羅幔虫
蟻蛀烈士為吞聲清風激頑懦

九潭

岩岩千仞嶺下有百尺潭夕風起微瀾泚泚動
晴嵐俯之鑿我心佇翫雲波涵流蕤颺寒清躍
魚胡可探蹊暝樵響歇猿鳥來相叅寄語泥中
物長蟠恐未堪

何景明

武陵

武陵一何長遼遠不可測高林多悲風慘澹日
無色黃熊啼我前白狐跳我側蛟螭蟠深淵下

見奔雲黑沙蒸水亦毒我僕飢且踣辭家忽逾
秋適此萬里國土風日以殊川城邈無極伏波
有遺響吟餘轉悽惻何用托橫吹一寫千載臆
自武陵至沅陵道中

驅馬山上行山高何巍巍修阪接飛翼百步仍
九迴俛視烟藹中衆山鬱何纍茫然望四海萬
物亦已衰昔我別京國朱華猶未希歲節忽復
易何時當旋歸

其二

大壑百餘尺流水浩湯湯我行路中斷欲度無
橋梁誰為理舟楫石亂不可航改轍上危棧登
茲千仞岡臨深古有戒側足以傷惶

許下

伊昔炎漢季西京方遘患宮室燒燔盡乘輿播
草間劫遷留茲域荆棘滿頽垣橫流一以濫大
厦寧復完豺虎互馳噬鴟鴞厲飛翻日月屢薄
蝕風雲變無端嗟哉衆君子杖策起周旋荀公
誠偉士弘思濟其艱陳琳自南至王粲亦西還
從我藉雄辯騰步有榮觀良蹇豈同御鳳鷲不
共淪功名安足為明義乃高賢

還至別業

依依入鄉閭慘惻歷故疆行邁踰幾時所見忽
以更成人匪故識耆齒日凋喪平生所同歡轉
盼殊存亡羈魂邈遐域旅柩歸中堂人命不相
持奄忽如朝霜撫事感今昔喟然熱衷腸

雜詩

西陸移修畧素節多寒陰端居屏營慮淒氣慘

人心浮颺委時卉零露傷青林仰見孤雌翔玄
鳥無遺音蟋蟀何愁苦終夜長哀吟感物興慨
嘆幽思孰能任

悼往

行雲不歸山逝水難重迴與子一為別流光倏
如摧形神往無存夢想弗克諧孤冢日荒穢幽
泉翳窮埃重扃一以閉千秋寧復開時至展遐
忱傾醕澆黃菜還思平生居歲久生夕苔寒風
吹空閨彷彿鳴玉哀人生重恩義况茲比翼乖
何能眷新歡棄置故所懷

贈孟望之

昔子當北徂值予復南旋相違踰幾時世事倏
推遷訪舊半存亡誰能不摧顏浮雲歲暮征餘
耀銜西山居人念川塗行子戀鄉關平生雙龍
劍乖別何時還志士重明德窮達奚足歡願君
勗令名相期在盛年

贈李獻吉

西方有佳士於世寡所諧橫風整修翰倏忽超

九達天門限重關屢扣閣者辭濟濟列仙子冠
裳競追隨青雲蔽閭闔仰視何逶迤皎日匿西
陸馳光難遽回世無魯陽子坐惜朱顏衰

其二

烈女守閨室憂日懷寸陰橫琴寫妙曲繁商激
陽林悠悠行路子誰為識其音人生處世間貴
在相知心所以采薇士甘餓西山岑

遊魯山城南舍

猗彼方外客逍遙城南野初夏苗始盛荷笠事
田圃地僻寡鄰舍彌旬絕車馬紅葵生井上青
榆蔭堂下前岡後有岑原澤何煦煦清風林下
酌狼籍列樽俎翻思在朝市役役徒勞苦

詠懷

北陸無淹晷歲邁陰已長攝衣起中夜凜凜悲
嚴霜明月麗高隅繁宿縱以橫徘徊仰天漢惋
彼參與商形影永乖隔萬里徒相望

其二

飛鴻導故渚長鳴有餘哀北地多悲風霜雪日

已催靈鳥集君舍君反見疑猜忠信苟不顯殺
身亦何為始知山梁雉欲下仍徘徊

其三

白玉本自白蒼蠅亂其真讒言解膠漆况匪平
生親烈士死道傷貪夫登要津自古皆有然茲
恨何當申蓬丘眇煙霧貝宮鬱嶙峋列仙如可
期吾將躡清塵

送崔氏

疇昔衣冠士同遊若雲爛懽宴未及終存亡在
轉盼亡者長沉埋存者各飄散俯仰天地間念
之一惋歎出門送我友言返故鄉縣登高望古
疆河衛浩以漫山川白日冥匹鳥鳴相亂愴惻
懷征途令我腸中斷

其二

飄飄山上葛纍纍田中瓠苟非同根蒂纏綿安
得固人情易反覆結交有新故嗟哉夙昔好垂
棄在中路明珠儻無因按劍不我顧深言匪由
衷白首為相誤亮君勗恒德永副平生慕

顧璘

新營田園輒賦

陶公歸桑里謝客營石門於世既無競努力事
田園春還理荒穢良苗應時繁豈不念歲豐天
道難預論列槿藩草屋藝蔬備晨飧郊居漸成
趣益厭城市喧菽水苟無闕萬事奚足言

其二

散步龍山麓石馬高嶙峋蕪沒野田側行列不
復陳不知何代墓感歎為沾巾慨昔六代交紫
宮架天津虎鬪盡英辟鷹揚皆貴臣回眸耀白
日吐氣貫青旻見者恒辟易况敢託交親詎知
百世下骨肉化飛塵樵牧無人禁姓名亦已湮
念此返田舍秫酒正芳醇傾壺且一醉兀兀忘
吾身

王九思

北遊

僕夫夙嚴駕曰予徂渭陽出郭縱遐眺原野何
茫茫是時春氣浮雪融塵不揚條風應候至征

鴈復北翔汨汨水泉鳴岸柳柔且黃感茲悅心
意寧知道路長因思在環堵俛仰徒面墻安得
長出遊撫景以徜徉

邊貢

贈友

春陽初獻歲芳樹日以青送遠及近郊何由申
我情我情方鬱紆君駕不可停瞻彼飛鴻翼聯
翩共遐征奕奕雲中河爛爛川上星中願渺難
遂佇立以屏營

秋郊別意為汝南孟翁補作

言別上春時當秋始來還禾黍一已獲
膾膾見高原落日樵牧歸涼風散鷄豚登堂見鄰叟呼
兒具盤飧依依丘中情款款醉後言即爾足為
樂安用乘華軒

贈王文熙

總轡城東門繚繚行子輶郊原茂時卉林薄鳴
春鳩登高眺連岡川途邈且脩俯睇川上波泛
泛鳧與鷗一為離群感淚下不能收

荅石峰見懷之作

斗柄當西南河漢東北傾
零露華白晶晶天宇晴
微風度廣除熠燿時復明
卉木日已黃秋氣日已清
念子理素瑟苦調多離聲
嗷嗷失侶鴈汎汎隨波萍
會合固有期此際難為情

入錐石口

西登錐石口鳥道不盈尺
連山樹如繡雲中日將夕
不聞樵採音但見虎行跡

王守仁

懷汪抑之

一日復一日去子日以遠
惠我金石言沉鬱未能展
人生各有際道誼尤所眷
嘗嘆兒女悲憂來仍不免
緬懷滄洲期聊以慰遲晚

其二

遲晚不足嘆人命各有常
相去忽萬里河山鬱蒼蒼
中夜不能寐起視江月光
中情良自抑美人難自忘

秋夜

樹暝栖翼喧螢飛夜堂靜遙穹出晴月低簷入
峰影窅然坐幽獨怵爾抱深警年徂道無聞心
違跡未屏蕭瑟中林秋雲凝松桂冷山泉豈無
適離人懷故境安得駕雲鴻高飛越南景

左國璣

竺谿煙雨

白雲出崖間化作橫天雨溟濛竺谿寺樓觀不
可覩遙聞疎鐘來杳靄度前浦嗟爾山中人經
年不出戶因知靜者心悵然青蓮宇

芳洲吟

蒿艾徒滿握不如佩蘭芷所期芳洲人弭棹在
何許烟波浩無際凝望獨延佇日暮思不來涕
泣零如雨

孫一元

江上餞別友人

念深重離筵含酸聽我歌天寒冰澌結君徂當
柰何窮獸不出藪倦鳥豈離柯期子早歸來歲
晏守山阿

雜感

抱易任南山日與湖水對烟霞散不收晨昏變
竒態亦知避世心翛然自我輩乾坤古神器機
運相謝代道術獵羣動兀兀意獨在

康海

靈寶縣北渡解州遙望餞送諸君子作

春遊過名里覽眺窮幽暱將邁苦匆促振袂惟
太息執手河梁間徘徊意安極衰年多酒癥緣
興輒強食節物乖素心親故難屢值因之趨解
梁不謂路咫尺佳辰邁熙陽良晤悲古昔疾舟
若轉焱相望忽相失

王廷相

雜懷

阿閣一何高中有傾城姿良人遠從征翩翩五
陵兒龍馬雪花白歲晏不言歸悲風搖沙草霜
露復淒其念君衣裳單撫弄流黃機竟日不成
匹一吁纔一絲織作鴛鴦紋雙雙自相依

其二

桐生泰山阿修幹凌朝曦斲作龍唇琴清商一
何悲一身赴遠道江湖眇難期浮雲蔽白日天
門鬱崔嵬佳人在何許有懷疇能知願欲託飄
音寄我長相思絃罷意已忘悵悵傷肝脾

其三

飛鴻遵廣渚紫燕巢華屋章甫適百粵角巾走
東陸君子安所遇俗士多昏逐豈必論幽尚朝
市有高躅至人不嬰垢蕭散道自足既寡憂虞
懷何須季主卜

擬古

驅車上東門言過五侯宅青樓連苑起朱戶夾
道直軒車若流水冠蓋填廣陌樓中多妖艷繁
繁弄雲瑟一盼傾人城千金不足惜安知紫霞
士不為荒淫惑蘭茝乃同臭鵬鷄豈並翮女蘿
不知幾綿幕成禍厄苟非同心友繾綣復何益

贈劉子潤之

鷓雛何啾啾食之不言飢與君結明信山海終
不移相將萬里途意氣我所依玉劔帶秋水馬

色雙蟠螭勤力敷王事日月何逶遲嗟彼章句
儒嗚嗚任言辭大道吹萬有靈筌秉先機仲尼
陳蔡琴伯夷首陽薇疇能明取舍百代流音徽

明詩正聲卷之三

五言古詩三

廣陵

盧純學

編輯

江一夔

校閱

徐禎卿

學謝靈運華子岡詩贈趙建昌

朱巒蔚靈輿雲海互盤旋陰霞絢石室夾篠蔽
清漣翠羽紛啁哳瓊蘂合芬妍桂嶺屯蒼靄桃
蹊迷紫煙朝登郡樓望佳氣鬱葱芊挹景企嘉
客臨風懷羽仙冥賞非偶愜神理豈虛傳建德

寡民務山水發清絃順性奚矯迹知道在忘筌
非君秉淵尚茲理誰為宣

懷往

昔我逢休景結交共雲翔秦客穆修矩魯生蔚
令章同聲展言笑四座發芬芳北牖湛清酒明
月出西方廣署滅流塵蘭燈揚朱光極意連篇
翰良夜殊未央歡宴豐時豫千秋焉可忘流光
一朝絕撫膺增慨慷

留別都城諸同志

對酒忽不樂惻然懷別離別離結中勞眷彼長
路岐苒苒郊河樹曖曖關門祠佇望瀟湘水先
與秋風期鴻鴈雲中來噉噉使人悲懷哉爾方
集悵矣予當辭

孟洋

貽友人

清雲度高漢落日下遠戍行子倦孤征稅駕咸
陽暮空林宿雨微虛簷滴松露悵然懷美人昔
會今不晤濁酒誰為傾強歌未成趣豈無四海

新交不如故

鄭善夫

元日

東君御征轅玄冥迅回車
溫風倏爾至古梅茁
其葩桃戶新受符蓼盤香
團芽感此念故里因
之懷年華炙蠟洽弟兄
問歲話桑麻二碁走
逋旅簪紱生嘆嗟坐茲
失初服五內長負疴
兔窟有穴狐凰木亦棲
鴉悟機貴在蚤勿令
負雲霞

贈黃肇

終風勁柔條遊子返故鄉
兄嫂糝藜羹慈母縫
衣裳離觥戴恓惻平日
天一方來忘楚塞遠去
覺閩山長

東海有一士

東海有一士被服雲錦裳
饑飡炎洲霞渴吸瑤
池漿鶴馭何翩翩九垓
一相羊朝發岡竄野夕
息沉默鄉睦言與汗漫
抗臂窮洪荒九州雖云
大視之如室堂紛紛尺
蠖徒看彼鴻鵠翔

初離京邑留別諸同志

陳車遵城闈振策導廣路仰盼孤雲征俯見流
波泝感念平生懽豈以杯酒故羣居不自覺相
失增怨慕川河引舟楫陵陸曠烟霧重覲難可
尋努力敷襟素

岳江送汝厲

西北日晚晚宮觀凝寒烟行子暮何之駕言北
之燕前驂結良駟後徒控華旃中輿歌響發楚
聲一何繁一闕遠別離再闕行路難薊門無清
塵易水有急湍曠士懷明義天步故多艱賤子
甘自營淪晦亦所懽垂期在昧旦且復敘涼暄
容輝無時及表之英琅玕

擬古

勛名不可圖嘆彼時運乖佳人處幽谷心思日
如摧未盱柴門閉盛年不克諧豈無合懽意蹇
脩孰與媒霜閨雲被寒玉顏暗中頽翹首孤飛
鴈靡靡令心哀

宿石竹巖

寢疴坐情累削迹離故家屆茲仲如月氣候清

且嘉迢迢紫雲洞渺渺天一涯尋壑滯瀑流攀
岑悟靈芽千峯遞生態百艸互吐葩周覽蕩節
物况乃凌紫霞神仙彷彿遇導我營丹砂丹砂
未易營緇鬢早已華神理寓隱蹟時變增感嗟
至人有逸念存形非所多

遊建州陶園

我行復中野怛怛自今茲蹭蹬勿重陳所傷命
與時非無青霞質素衣向已緇側聞雍門彈慰
此中憂疑憂憂卒未解至音已無辭古風落冥
冥大道不可思王喬非予願詹尹亦我欺江花
莽消息遊子暮何之相逢東園公遺我考槃詩

其二

楚江有杜蘅葉短不堪採越山有舜華秀色昏
旦改不如擷夫容遠意薄雲海美人隔秋波秋
容澹相待悠悠鶚冠子遯世豈有悔

湛若水

過錢唐江將訪王太冢宰

迢迢涉江去江介生淒風涉之將奚為南湖采

明言上卷
卷之三
芙蓉美人在遠道我心憂忡忡登山足夔魅蹈
海多魚龍俯仰天地內去子誰予從

陸深

贈別徐昌穀

北風吹我衣送子山之隅一瞻再三顧別離在
斯須知遇良獨難工瑟徒好竽感念管鮑私安
得不區區昔為比翼鳥今如失水魚一日為三
秋悵望增欷歔

戴冠

送應邦昇

凱風自南來游子去何之歸心切吳會片帆疾
如馳欲攬不可得誓將從此辭古人重生別况
乃心相知臨期聊躑躅執手道所思所思不能
盡仰視紅日頽問子何時返春風以為期

常倫

述情上大司徒李公

微軀何薄劣弱冠侍清朝為郎非所好移病
歸東臯自愜終焉計七見發天桃風塵屢瀕洞

琴酒餘逍遙欣遇日月新不辭郡國勞職司期
死報富貴非所要時命乃大謬釁讐夙自招縱
鱗趨下流鍛翹良蓬蒿幸親謝太傅東山時見
招過垂國士顧期我以雲霄在昔嗜玄典先民
仰清高長公一仕漢巢父獨辭堯心事倘遂白
丹壑嬉以遨

司馬文園

長卿詞賦雄蛟龍潛江涘滌器不足慙題橋聊
自矢遊梁竟蕭索賦漢何華綺駟駕酬夙言驅
駑良亦侈晚節淪茂陵移病老桑梓徒聞身後
書登封泰山壘

陶彭澤

陶令冲散徒由來達人胄雅德浮潛輝流譽邁
時秀代謝古斯須出處乃邂逅塵俗眩紛華王
謝逋簪綬沉飲非酒淫稅駕聊自守矯世著醇
樸丹衷良可善

山居懷王公濟

夏山滴蒼翠樓閣俯芳林白雲開遠眺玄典慰

幽心素琴時在御濁酒時自斟持此足自樂恨
不同所欽仰顧西飛鳥情馳金玉音

楊慎

行旅

行旅苦日短勞人知路遙忽忽歲云暮客子心
搖搖曠野饒寒氣四望但寂寥嚴霜下豐草朔
風鳴枯條浮雲起為蓋堅冰結為橋白日隱餘
照玄陰晡層霄鳴轂無停輪嘶馬不解鑣飛鳥
夕知還征途何迢迢何以慰苦心興言自成謠

涉江采芙蓉

沉沉秋江水灼灼芙蓉花葉葉凌清霜枝枝明
朝霞娟娟東隣子采采惜芳華昔時贈同心今
日悲天涯欲寄苦無因向風長嘆嗟

崦關行

晨行崦關道此道一何難層陵高不極脩坂回
鬱盤季冬十二月時節正嚴寒馬蹄帶霜雪車
轍帶岡巒凌澌正堅洹河水無汎瀾通達結陳
溜改徑陟嶺岼四望少烟火鳥路俯鴻磐悲風

號古木響入玄雲端居人盡塞向行者為槃跚
野狼嘯昏侶饑鷹短晚翰迢迢村郭遠行行未
解鞍凜凜歲方晏去去程猶寬勞歌以詠志釋
此越鄉嘆

集弘法寺後圃小山

黃鳥語春晚青林生夏陰禪宮靜鐘梵寧知車
馬音率爾成嘉遇晤言良所欽對酒俯樓殿步
屣陟丘岑謀野既有獲在遠亦會心懷哉幽寂
地茲遊可重尋擾擾望城闈欲去愧塵襟

別用貞弟

征馬矯西首離瑟揚南音懿親將遠別置酒坐
華林中量豈獨淺強飲不盡斟分手即岐路千
里在寸陰習習東風來飄飄遊子心山川脩且
闊羈思壯難任馳情天一涯結夢江之潯要我
清商節聆子吹篴吟

荅程以道

驅馬國西門整駕城南端出宿指賓館飲餞臨
河干中道逢嘉友誰云行路難四海皆兄弟况

是平生歡贈我錦繡段佩之當衿鞶上縷膠與
漆下繪芝與蘭芝蘭芳不歇膠漆情無彈韻為
雙飛鳧隨君千里翰

張治

薊哀王輓訶應制

鳳雛何翩翩頡頏翔天關悲風起中路竟去不
復還九苞既零落竹實空摧殘惟餘清霄月千
古照丹山

其二

曉發黃金屋暮歸北山岡蕭蕭薊門路白日慘
不光寒風厲廣野素旒隨風揚鴻名照金石修
短寧足傷

其三

嚴霜度中夜悴此瓊瑤柯芳華悲萎質逝水感
頽波松栢古原上落日青峩峩物理有摧折憂
傷竟如何

薛蕙

詠懷

生才良不幸處世誠獨難揚蛾興妬階懷璧賈
罪端靈均既見放韓非亦自殘奉身失所從慷
慨使我嘆

其二

茲年忽將逝我心愴以哀日暮不遑食空堂獨
徘徊駕言出西城中有池與臺清渠夾阡陌寒
露被蒿萊慨念昔時人零落安在哉玄象無淹
次四序倏如摧自非藉榮名一日等塵埃

雜體詩五首

陳思王

贈友

西京興亂階四海遘艱厄皇佐奮神武股肱效
群畫英賢盡同朝夙願今始獲並坐接華裯聯
步陵飛閣中饋薦甘旨金壘汎清酌眷言申情
暱終讌展戲譎君子肅令儀俛仰存謙約明信
良可希驕盈義所薄各享百歲期鑒此平生諾

王侍中

從軍

出車鄴城外駕言指南鄉我君整六師赫赫征
東方千艘泝淮浦武騎發河陽豈不懷歸思王

事不可忘鬱鬱涉長塗觸目多憂傷葭莖盈深
涯榛棘蔽高岡悲風振中野陰雲起迴翔羈鳥
鳴我前孤獸馳我傍伊昔東山人三年事戎行
捐私報公家終以反故疆勗哉同袍子永言視
斯章

張司空

閨情

初月升簾櫳涼風吹綺疏佳人阻晤語永夕獨
躊躇羅幃張虛宇朱火照空隅樂闋懽不足悲
興哀有餘寤寐思淑儷拊衿嘆離居

劉太尉

傷亂

晉京涉厄運神州困夷孽乾棟隕炎燎坤輿覆
危轍伊余孱且弱負荷忝朝列愆釁既已淪哀
憤徒云結惟昔仲山甫佐宣補袞闕范生反會
稽再舉夫差滅高帝還新豐鴻門賴人傑靜言
思數子顧已傷薄劣白日逝若飛俛仰薄暮節
良辰不可遇我志將安設大化信盈虛昏明亦
更迭畢力濟公室引領企時哲

謝臨川

遊山

明詩正聲 卷之三
徂節淹登臨開歲促遊翫陰崖雪猶積陽谿冰
始泮進帆憩絕壁抗策陟穹岬撫化雖未盈即
事已可玩幽谷風華媚晴峯雲彩粲尋異跡轉
緬覽勝景迭換洲分島參錯巖聚岫回亂丹梯
架懸梁石室構層館初經洞穴底乍出翠微半
羽人謝世運靈境變昏旦汗漫無冥期疏屬有
塵絆放懷聊自慰含情為誰歎

贈張仲修

良時難屢得嘉會不可并人命當幾何誰能俟
河清曰余服事始疾疴坐相嬰竄身里閭問奄
忽踰三齡君子不我遺眷言慰平生自慚菲薄
質感此相招情在昔仰先民出處各有經友朋
良足慰翹車非所榮一心抱區區常恐不見明
願垂金玉音示我以周行

荅何大復

宵懽不繼晨朝游豈延夕欸念未云周勞心彌
已積篤好追昔悰興言撫今戚纏綿金玉音參
差翰墨跡開帙虛雲閣臨觴闕瑤席惠思荷來

章寒裳奉良覲

行園

巾駕入丘樊披榛理園囿前臨古壑路却望清
渦曲經營闢池館周流羅卉木風落繽紛葉露
冒葳蕤竹窈窕殊冬夏寂寥異昏旭野陰當晝
暝水氣先秋肅少壯旅衣冠疲病歸農牧蹉跎
任情性蕭散諧心目雅懷名山意益厭人間俗
歲晏終如何行行訪巖谷

自西野循渦曲臨眺贈同遊者

養拙非藏器寢疴豈逃名進慚冠蓋群退慕丘
園耕多病齒髮暮屏居懷抱盈稍尋臯壤樂整
慰蹉跎情入野緬曲折臨谿屢迴縈霜濃石道
淨水歛雲潭清煙景淡將夕汀洲遞微明踈蕪
岸篠落寥戾川禽鳴心賞夙所重身累適已輕
豈辭疲曳倦幸與良遊并濟時謝明哲量已保
幽貞願從求羊輩放曠終吾生

王廷陳

別張子言

我友駕言邁去去之朔方晨起趨中厨為我具
酒漿長別在須臾且願盡杯觴昔為骨肉親比
翼雲中翔今當永乖違邈若參與商出門異鄉
縣居世如朝霜世途轉傾側良會安可常羸馬
感人情哀鳴衢路傷悲風振喬林琴瑟傷肝腸
執手不能辭淚下霑衣裳恨無晨風翰送子還
故鄉

其二

故鄉豈不思臨發中徘徊借問欲誰須重與心
知違山海高且深見面未有期有懷今不盡相
思亦何為豈無絃歌曲調促令心悲立語未及
終白日奄忽移安得魯陽戈揮景使東馳

其三

馳景不少待客子何可留相送不覺遠行行至
河洲中有雙黃鵠飛鳴偕匹儔驚風揚洪波散
失焉能求雌雄相背飛影響日以適鳧鶩豈不
多嗟哉非我仇願言樹萱草以解心煩憂

別張子魚

鳴鹿在中野獲草求其羣嗟哉昔所權一散如
飈塵虞卿棄相印擔簦狗情親悔吝不自惜義
聲流千春此道惜已久遺響誰為申子其懷璠
璣慰我多苦辛

詠懷

里中有一士栖栖蓬戶間動依高士跡居誦先
民言盜中無斗儲桁上衣無完藜藿并日得續
絮豈禦寒伏臘祀每廢妻子顏苦艱常恐志節
虧不屑親知憐入門四壁立顧之絕愁嘆饑食

拒嗟來渴飲避貪泉一簞恒晏如田也稱大賢

其二

忽忽行欲暮遑遑復何之征馬立踟躕遠道安
可期霜霰被原野北風吹我衣孤鴻飛且號虎
兕夾林啼崎嶇不獲騁徒旅長嘆咨回車亦已
晚失路良可嗤嗟哉客遊子念此早旋歸

其三

茲歲忽云暮駕言出城闈楊林翳白日岡岑蔽
玄雲荒原離獸馳寒鳥鳴索羣上有百尺臺下

有千古墳登高一騁望思我平生親延佇久不
至俛仰懷酸辛萬物靡不化千載猶茲辰驅馬
復來旋詠歌聊飲醇

許宗魯

古意

妾本河邊柳隨風不自持君為上林鶯胡乃眷
卑枝栖息詎無久飛遷諒有期折此柔條贈寄
言長相思

敖英

憶湖南舊遊

孤帆忽西邁超忽憑虛遊江風出斷岬細雨菰
蒲秋美人隔湘浦遺我珊瑚鈎安得雲間鴻一
寄心之愁

豐坊

詠懷

吾愛葛忠武事君不相疑吾慕郭汾陽一身任
安危撫今興百慮臨古何所師原泉嘆盈科佳
木媚華滋苟懷四方志萬物何足移

其二

飛雪散荒丘玄雲蔽重陰白馬誰家子射獵穿
幽林貂裘護玉體和鸞揚清音不見窮谷士抱
膝發長吟泠泠金石聲烈烈松栢心

頓銳

遊獵篇

宛洛盛遊冶京輔多膏粱華纓纈羅帶霧縠雲
錦裳朝騁期許史夜宴邀金張結交五陵豪狎
比羽林郎錦鞞臂蒼鶻金埒調驪驕吳鈞鷓鴣
膏琫琕繡鞞囊犀鋒挾秋雲龍文擽朝霜瓊纜
赤狻鞞玉鸞鳴鏘鏘組練光照地瑤裾何煒煌
行者下道周觀者滿路傍駟牡既駢駢戎軒亦
彭彭命儔嘯衡虞合圍闢廣場鷗弦控鳴鏑繭
絲妥遊韉俯身錐兔穴仰臂射天狼鼓吹日暮
還歡樂殊未央

白
言
上
卷

卷
之
三



